

四庫全書

集部

欽定四庫全書

集部

文忠集卷二

詳校官中書_臣張虎拜

侍讀_臣孫球覆勘

謄錄監生_臣任溥

欽定四庫全書

集部五

提要

文忠集六卷

別集類四元

臣等謹案文忠集六卷元王結撰結字義伯

定興人仁宗在潛邸時以薦充宿衛及即位

遷集賢直學士元統中官至中書左丞文忠

其謚也事蹟具元史本傳史稱結有集十五

卷王圻續文獻通考所載亦同今久散佚惟

散見永樂大典者採掇排比尚得詩一百三十四首詩餘十三首編為三卷又雜文九首為一卷問答五首為一卷善俗要義三十三條為一卷共成六卷結為元代名臣張珪稱其非聖賢之書不讀非仁義之言不談今觀是集殆非虛語詩多古體大抵眷容和平無鉤棘之態文亦明白暢達不涉雕華其中上宰相論八事書乃結年二十餘遊京師時所

作平生識力已具見于是問答五條皆與吳澄往復之語或闡儒理或明經義可畧見其學問之根柢善俗要義乃結為順德路總管時所作以化導閭里凡教養之法纖悉必備雖瑣事常談而委曲剴切謀畫周密如慈父兄之訓子弟循吏仁愛之意藹然具見于言表尤足以見其政事之大凡統觀所作所謂詞必軌于正理學必切于實用者也固不與

文章之士爭詞采之工拙矣乾隆四十六年
九月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

文忠集卷一

元王結撰

五言古詩

古意

幽人捐筋力自斲千畝荒手持蟠桃核種之南山陽一
年萌蘖生三年枝幹長迤邐三十年美實期見嘗客從
都邑來衣馬多輝光舞華欲分贈朝露含幽香笑我太
遠計悠悠何所望

詠史

公孫乘喪亂竊號據巴蜀援也惟故人千里來不速陞
戟森以嚴賓儀繁且縟畧去鄉曲情誇耀帝王服伏波
蓋代英豪氣謝羈束一笑井底蛙區區事邊幅駕言復
歸來玉趾真勞辱東方有美人展也劉文叔

孟氏命世賢抱道思經邦將隆堯舜業千里遊齊梁終
老無遇合遲遲尚徬徨魯平何足云讒夫有臧倉燕石
晒荆璧魚目笑夜光良寶竟棄捐千載為悲傷

戰國事富强好士爭相先翩翩四公子賓客盛三千吳
起既適楚樂毅亦歸燕鷄鳴狗盜賤我冠列賓筵孟晉
紹孔業赫赫蓋世賢伊誰共天職高論徒森然收彼腹
背羽六翮反棄捐亂亡諒不救烟戒垂千年

漢祖握乾符銳意除暴秦求賢冠台鼎蕭曹唯故人叔
孫亦世儒坐見禮樂新紛紛刀筆吏濟濟俱簪紳兩生
抱遺學獨與世殊倫躬耕汶水曲索寞誰相親

漢庭富衣冠流風重周旋君看往還人名位相後先憲

府領舉劾中臺執機權門闡隘輪蹄交口稱才賢亦有
同門友窮居守太玄過門不一顧寧望相薦延富貴且
交驩貧賤相棄捐翕翕夸毗子區區亦堪憐

騶虞宅靈囿丹鳳鳴朝陽濟濟羣與夔端委居廟堂雍
容百僚上都俞二帝旁靄靄王化隆皞皞斯民康懿德
冠羣倫名與日月章此道久陵遲誰為振頽綱喬松偃
澗底寸苗茂山岡蹶躡負且乘元元被餘殃念之軫余
懷憂思迫中腸感慨未能已零露忽沾裳我欲陳斯詩

其言悲且長聊且樂吾樂多憂令人傷

平津未遇時牧豕東海孺白首抱麟經英名動菑川王
明揚側陋台席冠羣賢未覩經邦業齷齪徒備員迎合
天子意首鼠持兩端既棄仲舒才寧顧汲黯言居然刀
筆吏謬以儒術緣阿諛負重任千載有餘愆自古寧一
死俯仰興長歎

嚴光隱桐廬遠跡混樵牧鶴書屢搜訪物色遍巖谷安
車入洛陽天子來同宿狂奴饒故態伸脚加帝腹長揖

金鑿殿超然返初服世祖不爲屈子陵豈爲漬公卿亦
何人視我同草木

古意

穹宇孰網維率土同照臨端拱遊穆清重明燭幽深寬
裕諒天覆發育惟天心仁義奠民極陽開復闔陰天人
永相符至理無古今應兮係所感善敗常相尋駕言適
郊原四牡行駸駸鴻鴈號空陂鷹隼集北林長歌漫鳴
鳴殷憂亦欽欽后夔威鳳來如玉式如金渾渾開塵編

渺渺驅煩襟

猖狂無鹽醜自獻投齊君綽約東家施俯首羞效顰蹇
修稱良灼采采華其身千金不一諾未易充下陳庭下
春華敷門前秋草新幽蘭生深林含香徒自珍憂心良
悄悄薄倖空紛紛願言金玉操歲晚無緇磷

青青霜中柏鬱鬱千歲姿雙鳥何處來構巢最高枝拮
据巢已成啞啞哺其兒飛翔上林間勁羽明朝曦烏子
負靈名見異忽噪之一朝啄腥腐宛若城頭鷓梧桐何

金定四八
卷一
萋萋竹實亦離離
遲彼威鳳來
愴恨增傷悲

張梅友編修以古詩四首見贈次韻答之

野鶴愁樊籠
淵魚畏罟網
宿緣在丘壑
秋風動遐想
顧惟愚
慙姿難
逐世
俯仰豈無功名念
身屈道已枉
緬思牛山木
日夜在所養

游心經濟業
竒貨真可居
章甫適甌駱
一旦成區區
撫掌青雲人
笑我談詩書
舉世治筐篚
此風定誰驅
探丸欲掬之
滔滔竟何如

我本漢落人多君許同志屢陪杖屨遊洗心仰高義我
歸唐溪隱君守浙江吏聞然逃空虛玉音莫余棄矯首
鴈蕩山南雲滿離思

梅友溫
州人

黃鵠慕高舉拊翼臨幽燕晨昏違菽水一日如三年亦
有王使君懸車未華顛寄聲招我還恐為世網纏歸休
侍函丈努力希聖賢

仲安廉訪以遊唐溪二詩見贈作此奉答

五年客東州友道亦云廣豈伊曠同遊不如我賢丈川

塗緬離異形留心已往終焉阻良覲何由弭長想歸歟
有茲日駕言戒徂兩雍容造賓階秋空挹高爽公昔司
風憲謀國極忠謹中年清淨退超然逃世網招攜我輩
人物外窮幽賞琴樽對溪山杖屨涉林莽顧惟迂濶姿
慙公謬知獎屢承函文教頗覺道心長持身貴清潔涉
世禁哀枉邈焉期遠大前修以景仰明珠忽見貽蓬華
驚輝朗黽勉未能報脩然滌塵袂

雪後伏聞至治改元誕敷明詔覆育羣生德至

渥也謹賦五言古詩一章以形容盛美萬一

雨雪歲將晏祥風播陽春綸言頒九霄昭格協天人龍
袞措大圭齋明奉宗禋縉儀肅備物景貺斯無垠嗣服
謹初元體元以居仁烝民一何幸皞皞陶洪鈞何煩登
春臺何用歌南薰曠哉八紘內萬景欣芸芸小臣伏畎
畝擊壤偕齊民斐然遂成章猗那頌昌辰

士友屬和再次前韻

龍飛握乾符駘蕩坤輿春華勛駿儀刑欽恭以安人欽

恭惟孝思宗祏舉明禋昊穹錫純嘏汪濊流無垠彩鳳
銜丹書萬寓敷皇仁仁風播羣品塊坳如大鈞咨諏儲
榘楠選守亦復來蘭薰行着幽潛彥峩冠起耕芸周南
雖留滯幸備時雍民俯仰天壤間雅歌樂逢辰

立春

獻歲倏旬浹寒威尚留連今日復何日淑景初和暄綵
杖碎土牛春陽藹郊原出門步虛徐如身脫拘拳又如
三季末一見堯時天梅柳競開拆草芽亦芊芊萬木沐

和煦枯萎變芳妍
蹇余物之靈奚獨苦
迺遭明時未高
步朱墨事磨研
幽懷諒誰語
逍遙度芳年
短章雖漫興
聊用寫憂悵

贈別徐彥昭教授

崑丘孤鳳雛
米翮粲如綺
渥洼汗血駒
壯志在千里
徐生士林秀
蘄然見特立
妙年懷遠大
刊落紈綺習
傾心辱相訪
英姿照衡門
雅志許共學
遺經深討論
子來何遲遲
我去方汲汲
交臂遽分手
悵望何嗟及
臨歧重徘徊

徊一言持贈君人文垂煥炳要須策竒勲奮身遵大路
洗心居廣居棄捐俗學陋顏曾乃真儒人生若萍梗豈
得常相見契愛苟不忘千里同會面別後定相憶時時
惠徽音叙子日新功聊以慰我心

讀唐百家詩選

風雅變漢魏近古猶可取六朝傷綺靡道喪亦已久子
昂振高風感遇傳不朽李杜俄繼興英名擅星斗芙蓉
照初日亦有韋與柳衆賢復炳耀升堂窺戶牖森然萃

玉府煥若春花圃嗟嗟大厯還制作半好醜端為垂世
規區別豈容後荆公選詩眼政如經國手自用一何愚
美惡頗雜採驪珠時見遺魚目久為寶唐詩觀此足誣
人何太厚誣人寧此詩感歎重搔首

病中偶和韋蘓州詩

黃鵠戢短翮爰集江之涘海鷗憺相忘翛然亦戾止抱
瘵呻吟餘擊缶歌下里忽聞陽春曲南薰泛綠綺龍門
萃髦彥楚材稱杞梓迭奏正始音窈眇諧宮徵皇風藹

清穆大路平如砥言觀麗澤象怱怱最多士堅貞瑩圭
璧芳馨襲蘭芷戮力共我田前修蹈遐軌

作古詩一篇奉呈庶齋盛翁暨諸士友繼再用
原韻未及錄呈蒙庶齋洎諸友示予和章而容
川劉君所作與余再和第二篇梓字韻一聯合
若符契迺重次前韻用以贈劉仍不改前句以
表志同道合之意云

盧阜抗靈嶽磅礴奠江浚豈伊宅列仙多士亦爰止士

林擢孤秀峩峩冠仙里貽我英瓊瑤藉以雙鴛綺愧此
樗櫟姿跂彼喬與梓墮篋唱斯和合宮復諧徵竒君如
莫邪鋒鏑幾淬砥積韞諒已久賞音豈無士老我歌遠
遊佩蒞扈芬芷方駕遵修途駢駢勿停軌

復次前韻呈庶齋先生

伊昔汗漫遊弭節江之涘娥英阻靈靚九疑徒仰止超
忽歲云邁駕言返田里被我芙蓉裳含章粲如綺亭亭
南山桐嶷嶷九山梓爰伐清廟瑟朱絃發宮徵顧惟推

鈍質永言資礪砥豈無青雲彥眷茲黃髮士贈我荆山
玉報以沅江芷軼駕諒絕塵遙驅尚同軌

病中偶讀韋蘇州歲日寄京師諸季端武等詩

因次其韻

卧疴逾休告偶遂清淨緣幽懷復坦坦謝彼塵慮牽憶
昨擁朱轡守邦江北壩異效鉛刀用矧茲強仕年上將
布德澤下以惠顛連拙疾負宿心孤節差可全緬懷千
載人聊用善自詮故山足棲遲解纓濯清泉縹緲造物

游閱此歲序遷孤鶴忽騰翥軒返芝田

無題

駑馬非龍媒形如渥洼駒眷戀棧豆恩低首駕鼓車逸
足思籥雲羈勒有所拘豈無九方歎相視空嗟吁天厩
十二閑飽秣玉山芻立仗殊不鳴矯矯真良圖造物等
嬉戲孰賢復孰愚浩歌撫秦缶繞屋聲嗚嗚

猗猗彼芳蘭托根華池邊婉孌結新婚期若金石堅金
石信不渝婚嫁當及年遙遙寄音迢遞阻山川望君

君未來芳歲宛徂遷感彼芙蓉華灼灼艷且鮮

黃河出崑崙九曲赴東海知歷幾險艱朝宗意斯在桓
桓南山松特立閱千載枝柯鬱且茂不為歲寒改世故
饒變更倚伏難豫待但秉金石心茲生尚無悔

西州有寒士結屋山之麓鋤治五畝園但植梧與竹汲
井滋芳根列垣護真木綠竹漸有實梧桐陰始綠鳳兮
渺何許遲爾一來辱雅意在千年君心何太速

肅肅張兔置依依守雉畢超然龍與鳳世外保優逸離

羣豈不若自願寡儔匹白駒為場苗俯首就維繫所以
巖子陵不為漢光屈

太公混漁釣伊尹隱耕耨一朝遇真賞歎起佐元后世
無九方臯相馬失之瘦昂昂千里駒安肯戀棧豆吾慕
鄭子真躬耕老巖岫

行行復行行出門恣遊行溪邊散餘步溪水清且淺魚
鳥各從容閒雲任舒卷秋風柳嶺岼歲寒松偃蹇喜茲
秋郊淨樂我襟懷展襟懷日以展我心日以遠安得同

志人共陟青雲燻

孤鳳行

青青南山樹羣鳥所托棲一鳥據其顛百鳥相追隨孤
鳳從南來采翮多光輝朝餐琅玕實暮宿梧桐枝昭然
文明祥應瑞安黔黎物情忌異類羣鳥爭背馳由來鸞
鳳心燕雀焉能窺矯首顧八荒欲向丹穴歸祥麟遊帝
郊黃龍棲天池何當會風雲相與垂鴻儀我欲獻丹誠
昌言犯羣威遲迴歲將晚悵望空嗟歎

送吳德讓先輩赴濟陽稅使

東州有佳士磊落青雲人胡為久不遇將老猶遭迤三年瀛洲幕小試才未伸抖擻簿書累日與文史親陽春良寡和趙壁絕縑磷閉門養廉素簞瓢樂清貧况復有令子迥為席上珍理義共怡悅翛然出塵紛勅書自天來監稅濟水濱驅車涉長道不遑駐逡巡愧我樗散材中空外輪囷遊君父子間厚意何眈眈歲月易徂邁倏忽及離辰後會定何日念之心紛紜徘徊衢路側持酒

重勸君佇立，忽不見，惘然愁我神。人生非鹿豕，安能久
同羣。唯當政理暇，早寄相思文。

贈張梅友

楚國有名姝，揚娥入修門。託身紫雲裏，頗承明主恩。衆
女競專房，青蠅點璵璠。深宮閉嬋娟，抑鬱空銜冤。悠悠
徂白日，寂寂愁黃昏。昔如鳥擇木，今若羝觸藩。青鳥有
脩翮，雲渺飛翻桃李。自敷榮脉脉，終無言海上逐臭
人。掩鼻惡蘭蓀，養彼惡木枝。棄此芳樹根，幾欲瀉肝膽。

長謠徹天闔為君一漭拂寒谷生春溫我方困貧蹇躡
嚙且復吞臨風歌此曲聊與知者論

贈王巨卿

天矯松柏姿恥效桃李顏冰霜摧萬木鬱鬱凌歲寒夫
君抱高躅幽素心自安蟬蛻聲利場永結詩書歡顯允
東菴公文學擬揚班晚喜得之子芳桂擢榛菅我亦寂
寞人深居結幽蘭荷君年德尊逸駕容追攀伐木何丁
丁鳥鳴亦關關眷言求友志千載誓弗諼古來道義交

志趣非俗觀青善復輔仁豁豁傾肺肝知人固未易賞
心良獨難珍重同懷人共考南澗樂

贈玉關子

集賢學士吏部尚書之弟號曰玉關子介吾宗英賢
別駕持卷求詩余觀玉關子詩筆畫品文采蔚然又
能清雅好古以求交於四方賢大夫士殊可尚已然
資稟高而年未艾更當玩心遺經使夫理明而義勝
則問學益進德性益尊其文藝之已能者愈見造詣

神妙攀古人之駕而與之並驅也勉旃毋怠
渥洼汗血駒西度流沙磧驥首一長鳴冀羣皆辟易矯
矯千里姿良樂逝安適緬彼十二閑踈促甘伏櫪鞮鞞
駕鼓車局促復何益聊續天馬歌一唱三歎息

贈成子周

若士抱高趣陸沈固無愠詩書闡鄉校優游樂終隱豈
無捷徑遊欲去誠不忍坐令歲月馳縞髮變元鬢溫溫
處謙卑坦坦絕畦畛每見心為降令人塵慮泯固窮凜

奇節摛文見豪敏破屋書五車不解抹寒霑美人慕佳
冶綠鬢插紅槿霜松老巖壑歲暮黃葉隕輝輝荆山前
伊誰發石韞更欲弦吾詩深衷寄瑤軫

贈丁左司太初

天馬來西極絕足日千里高義冠羣倫清修落紈綺明
時盛才彥經綸屬之子中臺入幕賓聊足慰遐邇班聯
玉筍間名在金甌裏除書從東曹機務煩料理向公乃
官職祇命不遑喜遲回弗敢進賀客空雲委臣門諒如

市臣心澹如水矧臣素多疾深懼孤任使祝君勿多讓
強為明詔起上振國綱維下撫民瘡痍植穀去稂莠選
材收杞梓努力樹勲名燭燭光信史蹇余困鉛槧碌碌
賤且鄙空存濟時心頭顱已如此君膺公輔望光寵方
未已佇看永徽風坐繼貞觀美賤子樗散材空名誤知
已猶能頌太平考槃西山趾

戲贈趙景賢

前年馬生角去年天雨粟悠悠千載間寒士難推轂趙

侯登仕版窘若推持屋鞍馬二十年官職何碌碌况我
草間人衡門抱幽獨豈無室家願無媒適為辱英賢滿
臺閣采采多奇服誰念千里駒跪若彼空谷

贈楊凝李璋

潛虬蟠尺水反受魚蝦制祥麟出非時未若犬羊貴古
來青雲人或作中林士流俗乏真賞白眼俯下視千年
陽春曲知音誠未易欲為巴人唱中情良自愧五年古
河間疎賤衆所棄風流兩懼仙叩門時一至楊子棄和

扁迫與世人異持身若醇儒鬱鬱懷利器李侯富春秋
天質溫且粹詩書窺閩域困窮有奇志嗟哉我非夫未
遂指困義獨有洙泗學汲引惟深地古友友其德今友
惟勢利勢利豈終保友情一朝墜君看桃李花春容徒
嫵媚不見松與柏歲寒有真意我歌伐木章一唱三歎
喟更欲白頭吟歲晚傷人思

姚雪齋雙泉詩

乾坤溘雙泉感沸秦山陽稟受各奇偏來者見未嘗西

泉冷於冰東泉沸如湯同流滙石室盥濯傾一方惟水
行地中寒溫亦何常如氣出諸口噓呵異炎涼清濟何
泠泠大河濁洋洋茫茫天壤間是物誰主張惟思此泉
上解衣一倡佯更欲灑八區滂沱洗民殃低徊不得去
緇塵滿襟裳矯首西南望怨彼關山長

文忠集卷一

欽定四庫全書

文忠集卷二

元 王結 撰

五言古詩

十月六日有白鶴數千自北而南迴翔飛集久之方去以詩紀之

青田有雙鶴養子沐溪中翛然出塵物此地未易逢今朝定何朝愛日初融融老鶴不知數翔舞盤高空軒軒萬里去意態何雍容赤霄侶威鳳不與鴛鴦同胡為此

來集眷眷意無窮羣仙宴鈞天興酣樂方冲遙憐有道
世故遣下瑤峯我亦磊落人永言謝樊籠幸遇此粲者
庶得諧心曾左引王子喬右挹浮丘翁翩然共僊馭欸
起凌長風餐霞餌甘液綠髮雙方瞳遨遊五百年駕言
還故宮

贈別李承之僉事

靡靡歲年晚肅肅霜露霏君子不遑處四牡來駢駢月
出方皎皎我心恒依依今夕復何夕山中仰容輝惠而

有深契使我心說夷北風日以涼行役乃無期言邁不可留悽然餞將歸永懷金玉音時得慰渴飢

次貢仲章韻二首

凌晨啓閭闔冠蓋何填填中有瀟灑人世網寧縈攀深巖玉堂署羣彥推子先高閑絕簿領坐閱歲序遷愧我縛塵纓仰止雲林僊會尋遂初賦振衣蒼厓顛

仲章號雲林子

巍巍蓋世勛赫赫高世名緬懷殷周盛取彼釣與耕云何商嶺老巖居避強羸歲暮黃鵠歌僅見羽翼成陵夷

百代下伊誰持此衡若人秉高志落落期壯行彈冠自
有道何必遺世榮

貢公未遺榮
康樂詩也

題許文仲餘歡堂

鶴鸞藹京國振羽天池濱美人青田鶴翛然出塵紛委
蛇隱市朝夷猶保天真熙熙黃虞化皞皞無懷民清歡
良有餘素節傳不泯階庭秀蘭玉衿佩還詵詵我來亦
清曠高風越羣倫卓哉董邵南無愧昌黎文

會飲

士友少嘉會遠矣非獨今今日復何日邂逅盍朋簪雲
翁古仙伯惠然一見臨羣賢意無間契愛逾蘭金笑言
不知疲善謔餘規箴一觴復一詠雍容樂且湛人生處
斯世悠悠誰賞音會遇不盡歡云何開我襟還思過三
爵為樂戒荒淫千年蟋蟀詩賢哉古人吟

送陳推官泉州之行

東皇布春令百卉競芳菲私懷獨耿耿重與伊人違念
子濟時傑職當列彤闈忠言補袞職勲庸紀常旂多士

仰清塵萬物蒙光輝胡為萬里行司刑南海湄四牡不
遑處王程自有期丈夫垂大觀遠行安足悲皎皎瓊樹
枝瘴癘非所疵雖居遐陋邦君子詎磷緇細民多詿誤
遠人半瘡痍期君樹佳政庶用慰渴飢

寄王誠甫

幽蘭生深林清香藹遐邇黃鵠志青雲舉翮日千里王
子當妙齡強學未為已高譽滿鄉閭文章燦如綺一朝
從辟書振袂幡然起霜臺足時英夫君望尤美食藜無

苦心飲水堅素履發軔萬里途行行未云已鑿車待騏
驎明堂須杞梓盛世立勲名輿情屬吾子我本蓬室士
門前結車軌深居味道腴靜坐玩經史荷衣扈江籬玉
珮紉芳芷深媿少師承期君為指示別來知幾何俛仰
踰一紀空記十年面未遂一笑喜引領北望君迢迢隔
烟水南轅倘過我洗心聞妙理

寄康和之先生

龍門紹絕學雲谷要成功坐令百代下一變洙泗風微

生一何幸恍若開盲聾寥寥千古夜日出扶桑東國朝
藹多士道統歸許公邇來誰繼之四海彝菴公溫溫君
子儒正學沃深衷廉隅厲其操道義飭其躬頽然物無
競澹若心獨沖和風與愛日觸物春融融聲名四十年
懷寶潛蒿蓬人間富與貴浮雲曳晴空謁來詔徵入盛
德師三雍還又謝病歸甘辭軒冕崇軒軒海上鶴冥冥
天際鴻弋人復何慕詎肯安樊籠愧我蒙厚顧兼葭倚
長松豈惟鄉曲念又喜臭味同顧茲魯鈍質願言資磨

龔何時侍函丈坐我春風中

中秋感懷

炎炎暑方徂忽忽秋已半涼風披梧楸白露洗河漢華
月出林表照我光爛爛恍然白銀闕萬里入奇觀旅館
政幽獨清光誰與翫憂思坐已盈長夜何時旦西南曠
庭幃山重路漫漫憐兒久飄零對月增浩歎方遊豈云
遠遭迴歲時換愁懷諒何似垢衣未濯浣犧尊薦清廟
不數溝中斷長哦五字詩聊用起慵悞

登開元寺塔呈同遊遂初敬仲二友

千尺玉浮圖孤撐插碧天步登最高頂縹緲青雲顛頓
忘六月暑迥脫市井喧極目眺區宇更覺心悠然太行
鎮中州勢與碣石聯唐溪注東溟千里青蜿蜒今日復
何日得此佳山川長風萬里來衣被輕翩翩舉手謝浮
世一笑如得仙况陪兩君子濟濟皆英賢高論屢起予
疊疊相後先我有白雲望不獲久隨肩驅馬復東去幽
懷良未宣夫君屬孤節賤子當勉旃莫忘共遊樂永保

金石堅

琴硯

南山有孤桐老幹青輪囷閱世百年久獨出萬木羣鍾
期既謝世伯牙亦凋淪徒抱琴瑟質棄置蒼崖濱磅礪
清淑氣抑鬱若不伸同類自相感孕秀入雲根良工有
妙識有見如揮斤爵以石鄉侯輒贈蕭散人朱絃不更
張徽軫良具存希聲闕堅璞文苑策竒勲體備金石堅
色含璋壁溫泓澄湛寒泉霑霽生玄雲銅雀等瓦礫端

石匪天真唯茲清廟器超絕難擬倫王君書翰學恐是
逸少孫得之喜無寐契愛踰情親明窻一揮霍氣象奴
羊欣邀我為賦詩自愧言無文獨有荒陋語為我試真
陳墨池未足貴筆塚未足珍名教有樂地吾道無緇磷
上窮洙泗源下沿濂洛津根柢既深固柯葉自繽紛矧
茲翰墨功從此如有神期君崇令德餘事同埃塵

寄高彥敬侍郎

燕山鬱秀色勢與嵩華同蟠屈掩幽薊突兀摩蒼穹英

靈賦斯人磊落皆豪雄君侯尤秀發傑出稠人中軒軒
萬里鶴矯矯千丈松道義冠羣倫文采傾諸公蘭省仰
清議柏臺乘舊驄丹心抱誠懇素節凜孤忠持憲荆湖
間禮樂變民風尺書近徵入帝咨汝共工看君絕世姿
會見不朽功清風映萬古永永垂無窮憶昔任城郡邂逅
欣初逢枉君高明鑒顧我栖遲蹤涼夜對榻眠言論
相從容政資薰陶益別離惜匆匆邇來六七年參商邈
西東我耕寬閒野君侍明光宮隱顯既殊途會合知無

從尚想見眉宇一洗鄙吝胸
世事諒難必幽懷徒忡忡
對菲倘不遺願托南飛鴻

重賦凝雲石

擾擾京華塵紛紛簿書叢
何以洗我心有此雲一峯雲
峯小靈鷲飛來杳無從
勿云拳石多綠翠如芙蓉
烟嵐靄氤氳巖岫虛玲瓏
玉立照書几一室春濛濛
西山鎮全燕秀色浮晴空
開軒遠相映氣勢爭相雄
主人有山癖夢想游華嵩
邂逅此尤物雅意極歡悰
石鼎插巖桂

瓦盆植稚松一笑成四老浩歌醉春風

春日偶感

溶溶陂水綠關關林鳥哢陽光入原隰春意欲飛動野
人振枯槁亦有瞻天夢縹緲蓬萊宮雲中見高棟

春陽媚朝華秋霜悲宿莽宿莽生已微朝華乃風雨幽
人兩相忘空山澹凝佇翛然釋塵縛翔泳遂鱗羽

登山無輕車涉水無方舟荏苒歲云徂行子何淹留所
思豈云遠在彼河中洲安得凌風雨日夕從之游

山花發新妍山鳥喧晴哢太昊乘蒼龍萬景各萌動貞
松聳幽壑獨抱歲寒夢千年構明堂尚可備梁棟

虛修被竒服深居翳林莽瞻彼道路長值此冥冥雨空
谷聆車音結蘭久延佇眷眷瑤華詞願托歸飛羽

誰謂大江遠亂流用輕舟風波耿中懷欲去還遲留粲
粲芙蓉裳米米蘭杜洲遙歸衡門下撫缶歌遠遊

郡齋偶成

孤雲何亭亭徘徊南山巔風飄忽從龍輪困間霏烟我

實迂踈姿夙締丘壑緣解蘭抗塵容繚繞世網纏三年
襄國守吏民頗相憐凝香坐郡閣誤得靜者便竭來廣
陵中愧彼騎鶴仙簿領何續紛獄訟亦喧闐謬懷清靜
化擾擾無由宣負此蚩蚩氓浩歎長風前老鶴困樊籠
鍛翮空聯翩芝田渺何許寤寐思騰騫故園耿幽懷宛
在唐溪邊長歌歸來辭亂以招隱篇

悠悠百年夢黯黯終日思黽勉慕高躅坐閱歲序馳分
符竊異恩中情恒忸怩願言策駕蹇誓將答鴻私上以

宣德澤下以撫惇嫠民淳訟事簡拙者何所施清時明
黜陟尸素恐見疵投劾早還歸東郊効耘耔經綸付羣
公勲庸紀常旂何以期歲晏硜硜不磷緇

伏暑蒸溽端如困酒南風時來冷然解醒醒爽
之餘抒發病思哦茲五言奉答嘉貺

昏昏毒炎溽溽言敞櫺軒輕風忽南來涼思何飄然南
風應嘉會操此長養權時能滌煩酷不異濯清泉重華
儼巖廊袵衣鼓朱絃汪濊敷湛恩因之被元元風霜豈

云屬開闔成歲年胡寧蚩蚩氓怨咨徒喧闐何年飛雙
鳧爰集崑崙巔永言謝寒暑喬松共周旋羈馮阻遐騁
長歌寫憂悵

題梅花橫披

凜凜歲方晏春意初未迴花神洩天機催起南枝梅孤
標冠羣芳高韻絕纖埃縹緲玉京人弭節疎林隈所畏
渺天末我馬方虺隤驛使未云逢月落空徘徊畫史寫
芳容橫枝綴瓊瑰撫卷又增歎美人猶未來

道士虛一趙君曩嘗代祀嶽瀆海鎮縉紳先生
矢詩以壯其遊今茲將歸休建業之玄妙乃作
五言一章以續前詩之末

孤鶴斂脩翮阿閣歸長離一舉越岷峨再舉臨天池今
年復何年重思脫塵羈縞衣照玄裳縹緲南雲飛冶城
邈清都羽人共追隨當年謝太傅行藏繫安危永懷東
西巖于茲亦依依君今蹈高躅終焉足棲遲蹇予畏官
箴騁望空嗟咨

送奉使幕府表希顏還京師

鳳凰覽德輝千仞翔雲霄燦然忽來儀豈惟聞簫韶美人抱荆璧雅志何崑崙側席政求賢我冠入清朝邂逅從芝宇曠爾塵慮消擊節誦新文凌雲氣飄飄顯允皇華使諮詢逮芻蕘婉畫幕中賓德音日孔昭高軒臨廣陵燭此久弊凋民瘼一以蘇連城涕歡謠征旆超金闕敷奏寬旰宵豸冠立霜臺白簡肅具僚病守困煩劇行當返漁樵祝子樹勲業努力希顏天

南谷學士示以舟行詩意圖且以鄙作見徵控
惚之餘哦茲五言聊塞雅命

鷗虞宅虛囿丹鳳鳴朝陽翩翩佳公子都俞輸巖廊游
心萬物表林壑思徜徉汴水泛孤舟飄然適維揚淮水
何舒舒淮山鬱蒼蒼雲山渺烟水萬古漁樵鄉遐觀一
適意與世如相忘寄此無聲詩敞屣遺軒裳古來豪傑
人知微復知章隱顯固殊途時行亦時藏願言崇懿德
焜耀垂耿光雖雖朝陽桐永著文明祥

七言古詩

歸去來圖

淵明雅放真高賢，遠與園綺相後先。
紛紛季世儘塵空，曾次獨有羲皇天。
傲裝聊試彭澤絃，拂衣旋復歸田園。
人生出處自有道，督郵屈見特寓言。
山陽虛位時迤邐，阿瞞功立九鼎遷。
乾坤一變義熙後，憂來涕泗如長川。
舉杯遙酌魯連子，幾欲同蹈東海壖。
把酒泛秋菊，南山相對心悠然。
清風凜凜映千古，丹青有筆誰能傳。

臨風撫卷三嘆息晴窻三復歸來篇

明妃曲

巫山處子入漢宮漢宮桃李無纖穠豐容靚飾照宮闕
秋波迥立玉芙蓉天子深宮初未知更堪宮女妬娥眉
黃金爭賂毛延壽丹青竟誤真妍媸一朝遠嫁難復留
空使君王誅畫史天心惻惻難食言重感君恩為君死
塞雲漫漫塞草黃羌笛一曲助悲涼回頭遙望漢宮月
照影依依還自傷妾生不及鴈隨陽斃斃終老天一方

琵琶聊寫思歸意傳與中州能斷腸
南北寢兵心自足
託身異域寧辭辱君不見烏孫公主漢懿親
西風萬里
歌黃鵠

秋日旅感

絲絲寒雨霏空碧一片清愁宛如織
候蟲抱恨復啾唧
萬里羈人嘆行役雌蜺千丈橫
晴秋須臾倒影吞江流
葛衫無奈風颼颼坐見暝色來
高樓北平飛將老不候
一言悟主田千秋明發往問滄江鷗
咄哉痴計良悠悠

借書

公擇藏書五老峰貽謀燕翼垂無窮眉山仙伯絕盛事
至今千載流清風雲孫磊落殊逸羣文雅彷彿如前人
牙籤插架三萬軸天祿石渠不足吞我生粗有劬學志
歲華荏苒嗟無似有願須讀未見書慚非宇內無雙士
知君好事絕等倫友朋就假寧憚勤異編隱帙倘垂示
微辭妙理當同聞

遊張氏別墅園

良辰媚景春為工遊人歡賞意正濃尋芳載酒適郊野
紛紜羅綺誇昌丰太平勝觀有如此人和物盛時屢豐
惜哉竟隨塵土網醉夢顛倒如盲聾小園跬步有佳趣
深靜頗與人心同芟除榛棘樹蘭蕙剪伐樗櫟植椅桐
依依烟柳方青蔥黃鸝紫燕鳴其中芬芳桃李爛雲錦
含姿弄色爭纖穠梨花娟娟如靜女數株晴雪朱欄東
蕭然玉立事閒潔不逐羣卉驚鉉紅我來對景有餘樂
幽興直與春融融舉杯自獻復自壽一笑豁此平生胸

東君似喜有佳客，鳥為歌舞花為容。太行為我亦改觀，
眉宇翠色浮晴空。眼中千年沂上翁，鏗然舍瑟意無窮。
更當招攜二三子，時時同詠舞雩風。

送段明府雄飛

美人奕奕瑚璉姿，卓懷小邑聊紆組。惠風善政撫疲癯，
奮髯嚼齒推強禦。操刀治劇有餘裕，四境熙熙皆樂土。
士元固非百里才，為治不妨希卓魯。公餘不逐歌舞場，
深居玩意詩書府。紛紜能吏治筐篋，邂逅眼中見此父。

顧我自為樗散材感君忘年謬收數百年定交心莫移
一言告別遽如許居民揮涕懷惠愛我亦悽然誰晤語
君材昂昂汗血駒朝發幽燕暮吳楚當今臺閣政推賢
看子軒然黃鵠舉

凝雲石為省郎張希孟賦


孤雲屯此三日霖幻作拳石亦竒絕天風吹墮几案間
紺玉巖巖聳高潔連娟衡霍真面目空明鳧繹古巖穴
浮嵐暖翠弄霏微疊嶂層巒出毫末張君歷下飽看山

猶說愛山深入骨凝雲此日落君手屋宇藏山更清徹
晴窻沉水炷玲瓏山出白雲足怡悅只愁翠潤濕衣巾
不用登臨勤履襪燕公夙稱大手筆得意江山助竒崛
竭來刮目閱新作炳炳烺烺更超越會當攜酒就君飲
徙倚巖石散華髮爽氣坐我冰壺中始覺人間無六月

捕蝗歎

田家愛苗如愛身朝鋤夕擁屯蒼雲那知螟蝨作妖孽
雄吞恣食何紛紛田間四望無邊垠老農感額心如焚

飛文令丞報郡守掃除撲擊連朝昏桑林駭駭伐鼙鼓
萬指奔趨赫如怒火雲烜赫日方災禦災捍患寧辭苦
夜深然火更焚瘞恐入隣州罹罪罟蝗蟲未盡苗已空
婦子哀哀淚如雨九重睿指燭幽遠廟堂至計寬邦本
詔書已復田租半賑乏行看倒倉困貧民小忍勿逃亡
眼中樂土知何鄉皇家盛德惠黎庶能令饑饉為豐穰



文忠集卷二

欽定四庫全書

集部

文忠集卷三

四

詳校官中書臣張虎拜

侍讀臣孫球覆勘

滕錄監生臣任溥

欽定四庫全書

文忠集卷三

元 王結 撰

五言律詩

東村道中

羸馬東村路
遨遊此日閒
寒風初凜冽
秋菊尚爛斑
古道橫清溜
平林出遠山
茅茨誰氏隱
瀟灑水雲間

七言律詩

次胡安常望京亭韻

倚天雙劍勢崔嵬力盡神丁路始開冀北河山壯京輦
雲間宮闕聳蓬萊舟車萬里通殊俗草樹千年鎖廢臺
欲向終南卜佳處赤城人老憶天台

復次前韻

少年胸次漫崔嵬握手為君一笑開之子今猶困鈇鑿
蹇余端合隱蒿萊燕山落落圍新邑易水迢迢映故臺
雲外少微黃一點含輝如欲避中台

登高陽臺詩二首

蓬萊仙子好樓居縹緲危簷接太虛千古江山幾分合
百年登眺獨躊躇波搖返照金溶漾天抹餘霞綺卷舒
萬里長空浩歌發晚山微露碧芙蕖

初擬登臨快野情百年興廢寸心生河山形勝無今古
藩屏人材繫重輕金宋承平見文物趙燕風氣盛豪英
遺臺故壘今如此慘淡經營畫不成

清明諸君邀登高陽臺

鬱鬱愁腸日九迴出門搔首獨徘徊偶因諸彥閒相過

聊喜孤懷得好開乘興尋詩同信步升高望遠強登臺
賞心會向醕佳節只欠春風酒一杯

和墳字韻呈雲齋先生

才名籍籍動簪紳雄筆盤盤覩典墳盛世政當求舊德
北山無用勒移文大名遠播詩千首草聖初傳酒半醺
金代風騷足良將定應推子冠三軍

翰墨林中老斲輪高詞真見婉皇墳忘年喜遇孔北海
碩學還隨鄭廣文綠髮方瞳身正健白鬚紅頰酒微醺

折衝樽俎須吾子堂上奇兵勝六軍

再和前韻

太古淳風昔未聞唯存二典失三墳潛心明德新民學
玩意經天緯地文排悶詩成時染翰澆書酒美漸為醺
憐渠未得吾真樂曾次紛紛戰兩軍

偶成

自笑山林麋鹿姿世緣驅迫到京師金張有籍通青瑣
嚴鄭無階上赤墀擾擾紛紛亦良苦熙熙攘攘竟何之

野鷗未是樊籠物夜江湖入夢思

青雲冠蓋滿皇州黃閣烏臺據上游時事糾紛空嘆息
賞音寥闊愧淹留公車辟掾求三語逆旅哦詩擬四愁
翁媪倚門心正切春風菽水去來休

次元復初韻

鸞馭翩翩隔紫霄百年清晤負良宵塵埃此日徒為擾
豪爽從今恐漸消蟻穴自知天欲雨桑田誰信海生潮
車如流水龍如馬惟有吾元共寂寥

紛紛蜂蝶帶芳叢
夢裏繁華一瞬空
綠樹陰陰鳩喚雨
閒庭悄悄絮隨風
雲深蓬島人難覓
水遠天台路不通
惆悵壯懷空潦倒
強尋詩句策奇功

再次叢字韻

小山碣礧桂成叢
逸屋清泉湛若空
鐵笛靜吹千古月
蘭舟獨釣一絲風
京塵漠漠衣空染
天路遙遙信未通
野鶴孤雲應笑我
幾年能了濟時功

次韻二首

靜掩柴荆聽雨聲，孤懷偏觸故鄉情。
蟪蛄結網徒紛擾，蟋蟀亂鳴如忿爭。
異國飄零憐客子，清時潦倒笑儒生。
百年勲業唯青簡，朝鏡蒼髯白幾莖。

夜窻梧竹戰秋聲，茅屋青燈萬古情。
眼底鷄蟲誰得失，角端蠻觸幾紛爭。
安車當日迎枚叟，前席何年問賈生。
應笑腐儒憂治世，丹心一寸雪千莖。

次韻答趙景賢

青雲冠蓋滿皇州，黃閣烏臺據上游。
萍梗嗟余無定著

金蘭惟子尚綢繆身居江海三千里夢落煙霄十二樓
莫道東山是黃槁為君談笑障橫流

次韻奉答伯生學士閑閑宗師

珪璧陶匏薦帝郊黃流玉瓚縮菁茅日升暘谷神人悅
星拱天樞上下交毓德經帷瞻內相禮賢鼎肉繼中庖
鷓鴣詎有冲霄翼容我疎林返舊巢

歡娛菽水曠晨昏接武鵷聯荷異恩自愧塵纓汗鳳沼
定知雲木嘆犧尊文章閣老推高雅德宇仙翁儼粹温

授我環中千古意共探月窟躡天根

次馬伯庸少監贈經筵官虞司業詩韻

簪紳星聚掖垣西芸簡含光動列奎日上岵夷鳴綵鳳
春生靈囿育斑麋寬仁自弭桑林異濬哲誰云大麓迷

佔畢小臣叨進讀涓埃無補愧栖栖

伯庸內翰繼學中郎唱酬河字韻詩

往返數次愈出愈奇然兩軍相薄短兵相接鏖戰爭勝未遑退舍魯仲連之徒聞之故特射一矢以解其紛

贈趙景賢

五年隨侍客東州傾蓋憐君若舊遊別後音徽怨離索

歸來情意益綢繆虛名自愧陳驚座佳句人傳趙倚樓
莫笑貧交淡於水詩筒來往亦風流

景賢守村庠以詩寄之

游仕歸來只舊貧蛙池清淺困修鱗公車未草三千牘
童子聊陪六七人鳳閣鸞臺元有命鷄棲豚甯暫為隣
青燈夜半彈長鈇慷慨悲歌氣益振

寄上劉時齋先生

悠悠軒冕各忘情萬里乾坤一草亭明月清風無盡藏

聖經賢傳有餘馨
花畦蔬圃觀生意
詩筆文章寫性靈
何日雍容陪杖履
揚休山立靜儀型

寄李茂實

伯季聯翩藝且賢
洞山衣鉢得真傳
思君屢賦停雲詠
求友重吟伐木篇
忍見飢鳧爭腐鼠
更憐羣蟻慕餘糧
丹山有鳥常孤苦
一望朝陽一惘然

偶感

崑崙積石導洪河
銀漢曾通萬里槎
自厭簪裳汗臺閣

政宜樵牧傍陵阿鳳麟呈瑞吾何與珠璧聯輝世豈多
玉署薇垣奏風雅空拳深愧敵操戈

贈臻上人

十年晏坐自安心澄寂那容世慮侵濯濯青蓮照寒水
巖巖古栢冠叢林君言淨國身差樂我悟吾門道更深
陶令不依香火社遠公有酒且同斟

洛水

洛水閩山道有傳積陰驚見日中天聖經賢傳無餘蘊

太極先天今始全
勉勉孳孳吾自力
熙熙攘攘更堪憐
月明午夜清如水
拂拭瑤琴理斷絃

明月泉

石泉噴礴湧冰輪
照映空山萬古新
百尺玉壺清徹底
千年寶鑑瑩無塵
寒波不種扶疎桂
圓折應涵徑寸珍
便好結茅臨水住
汗樽杯飲樂天真

杜和卿八十詩

壯歲文場早策功
丘園棲息播高風
三生夢落塵紛表

八秩身游壽域中
鬱鬱大椿常閱世
亭亭芳桂漸凌空
長懷清淨安民旨
更欲從容問蓋公

聞王景初訃音

函丈從容夙所思
盈盈一水阻光儀
道山忽已摧瓊樹
魯縣無由識紫芝
未展長材輔平世
唯餘雄筆冠當時
中州豪傑頻凋喪
重為斯文出涕洟

椰瓢

注瓦傾銀窟世緣
那知椰實得天全
漿如瓊液醺人醉

形若匏樽比石堅陋巷大賢應未見青州從事許忘年
橫挑徑入無何有夢見糟床酒澗泉

七言絕句

滾塵馬圖

千里霜蹄碾礪駿西風沙苑草連空陸梁展放一驤首
誰見天機滅沒中

次袁郎中韻

折得含桃雨後花自憐白髮照烏紗陌頭楊柳撩春思

掩映茅亭賣酒家

贈中洲高士

霧鬣風駿冀北羣騰驤川谷爛如雲憑君一顧千金駿
電逝飈馳要策勛

萬花園次韻

煩襟鬱鬱頓能開珍重皇華使者來廢圃登臨有高興
新詩壞壁寫浮埃

使星光動碧雲開春意都隨鳳詔來玉樹瓊枝慰飢渴

冰壺秋月絕纖埃

壬子元日

大人衣繡使遐荒
獨舉椒杯憶故鄉
仰祝慈闈共眉壽
朱顏黃髮樂倡佯

東城春早

年年桃李恨春遲
傳白施朱恐後時
文杏東城守枯槁
韶光先到向陽枝

冰河水燈

碧波千炬照魚龍
上下熒熒燭影紅
寄語春宵遊賞客
長明須藉緝熙功

戍樓殘照

萬里河山百戰場
愁來無處問興亡
明時混一兵戈息
古戍荒原空夕陽

雪江獨釣

羣玉山高湛碧江
輕絲小艇釣寒涼
那知萬騎文城路
夜剪鯨鮓奠蔡邦

廣陵程公通甫卜居騎鶴樓之右扁其齋曰鶴
西持卷求詩於予廼賦二絕句以塞命通甫昔
掾集賢予方繼入為直學士相得歡甚後予假
守此邦君亦得告家居相見歡若平生故終篇
畧及此意也

風臺月觀古揚州騎鶴南來亦漫游羨殺鶴樓西畔客
草堂清絕俯邗溝

持索西清笑語同五雲雙闕護蒼龍秋風鶴背重歡會

一洗塵埃芥蒂曾

松竹梅圖

蒼髯如戟歲寒姿持節龍孫此一時凜冽冰霜盜春意
東風昨夜到南枝

題鄭資山橫槊集

醉翁野鶴共飄然舒嘯崑丘小有天老手揮戈聊袖却
一襟清氣潤遺編

朔風倒捲浙江潮青蓋呈祥王氣銷玉帳談兵十年夢

乾坤清景入詩瓢

資山宋故將校卜築於揚之蜀崗號曰小有天扁其齋曰舒嘯其集中有

醉中引
鶴詩云

寄南臺治書曹士開

滹水悠悠遶郡城
百年遺愛換澄清
料應江表金陵月
祇似東垣午夜明

鳳凰臺古碧梧凋
建業江山久寂寥
忽見朝陽五色羽
舜廷何用奏簫韶

特書新起大農丞
輝映江天執法星
吳楚幾人分憲節

環瞻二老共儀刑

執法謂趙敬甫中丞也

心賞神交我與君
燕鴻越燕怨離羣
暖風晴日登臨處
目斷江東一片雲

無題

民彛物則自天全
秦火炎空詎可燃
妙理生生誰會得
鳶飛魚躍塞坤乾

聖心原委寓遺經
先達重陳炳日星
暇食安居了無事
明憲斐几靜儀刑

道匪虛無大路然周程授受有心傳可憐弄筆操觚者
抵死區區幾百年

山靜泉清全道體草生木長驗人心導涓護蘄兢兢意
何日清江映茂林

琳宮盆沼貯清泠七澤三湘照眼明並蒂芙蓉藏艷冶
露盤雙玉共金莖

露盤雙玉共金莖吸露仙人上碧冥手把雙荷一揮灑
羣生醉夢豁然醒

絕句

來時梅萼衝寒破歸去莪葵向日開
千古江山儼如畫
不堪荒草沒燕臺

詩餘

雨中客至

蝶戀花

人客幽燕懷故里野鶴孤雲笑我京塵底
鄭重佳賓勞
玉趾清談疊疊消愁思
細雨斜風聊爾耳
病怯輕寒
莫捲疎簾起燕燕于飛應有喜
泥融香徑營新壘

次韻答曹子貞臨江仙

寄語蓬萊山下客飄然俯瞰塵寰寥寥神境倚高寒步
虛仙語妙凌霧珮聲閒笑我年來渾潦倒多情風月
相關臨流結屋兩三間虛弦驚落雁倚杖看青山

秋日旅懷南鄉子

秋氣入簾櫳矮榻虛軒睡思濃夢覺黃梁初未熟相逢
都在邯鄲逆旅中擾擾政愁儂雨霽西山翠幾重更
上層樓間徙倚晴空目送冥飛萬里鴻

送俞時 水調歌頭

五采識中散野鶴自昂藏螢窓雪屋十載南國秀孤芳

河漢胷中九策

君嘗以用人
九策干中書

風雨筆頭十字畫省姓名

香文采黑頭掾輝映漢星郎 怕山間猿鶴怨理歸艎

人生幾度歡聚且莫訴離腸休戀江湖風月忘却雲霄

閩闔鴻鵠本高翔笑我漫浪者丘壑可倡祥

送李公敏

木蘭花慢

渺平蕪千里煙樹遠澹斜暉政秋色橫空西風浩蕩一

鴈南飛長安兩年行客更登山臨水送將歸可奈離懷
慘慘還令遠思依依 當年寥廓與君期塵滿芰荷衣
把千古高情傳將瑤瑟付與湘妃栽培海隅桃李洗蠻
烟瘴雨布春輝鸚鵡洲前夜月醉來傾寫珠璣

送趙致堂

江城子

嫩黃初上遠林端餞征鞍駐江干滿袖春風喬木舊衣
冠怎麼禁持離別恨傾濁酒助清歡 夫君家世幾鸚
鸞珥貂蟬侍金鑾筦庫而今誰著屈徵官鵬翼垂天聊

稅駕搏九萬看他年

詠鶴滿江紅

華表歸來猶記得舊時城郭還自嘆昂藏野態幾番前
却飲露豈能令我病窺魚政自妨人樂被天風吹夢落
樊籠情懷惡 緱嶺事青田約空悵望成離索但玄裳
縞袂宛然如昨日重逢王子晉玉笙悽斷歸寥廓儘
儂家丹鳳入雲中巢阿閣

秋日旅懷摸魚兒

快秋風颯然來此可能銷盡殘暑辭巢燕子呢喃語喚
起滿懷離苦來又去定笑我兩年京洛長羈旅此時愁
緒更門掩蒼苔黃昏人靜閒聽打窓雨 英雄事漫說
聞鷄起舞幽懷感念今古金張七葉貂蟬貴寂寞子雲
誰數癡絕處又剗地欲搽朱墨趨官府瑤琴獨撫惟流
水高山遺音三歎猶冀賞心遇

憶故人 沁園春

蓋世英雄谷口躬耕商山採芝甚野情自愛山林枯槁

矚儒那有廊廟英姿落魄狂游故人不見藹藹停雲酒
一卮青山外渺無窮煙水兩地相思 灤京著個分司
是鳴鳳朝陽此一時想朝行驚避豸冠繡服都人爭看
玉樹瓊枝燕寢凝香江湖載酒誰識三生杜牧之凝情
處望龍沙萬里暮雨絲絲

次范君鐸詔後喜雨韻

賀新郎

露下天如洗政新晴明河如練月華如水獨據胡床秋
夜永耿耿佳人千里空悵望丰容旖旎萬斛清愁縈懷抱

更蕭蕭蘋末西風起聊遣興吐清氣
鳳銜丹詔從天
至仰天衢前星炳耀私情還喜鴻鵠高飛橫四海何藉
區區園綺繩祖武昇平文治自笑飄零成底事裂荷衣
骭躡塵埃地逢大慶且沈醉

贈張子昭賀新郎

久作林泉主更忘機結盟鷗鷺逍遙容與蕙帳當年誰
喚起黃鵠軒然高舉渺萬里雲霄何許鶴爽憐君今猶
在正悲歌夜半鷄鳴舞嗟若輩豈子伍
華如桃李傾

城女悵靈竒芳心未會媒勞恩阻夢裏神遊湘江上
竟覓重華無處誰為倩湘娥傳語我相君非終窮者看
他年麟閣丹青汝聊痛飲緩愁苦

又子昭見和再用韻

挾策干明主望天門九重幽復周旋誰與斗酒新豐當
日事萬里風雲掀舉嘆碌碌因人如許昨日山中書來
報道烏能歌曲花能舞行邁遠共誰伍臨風撫掌癡
兒女問人生幾多恩怨肝腸深阻腐鼠飢鳶徒勞嚇回

首鷓鴣何處記千古南華妙語夜鶴朝猿煩寄謝抗塵
容俗態多慚汝應笑我漫勞苦

贈李公敏

蝶戀花

老鶴軒軒心萬里却被天風吹入樊籠裏野態昂藏
猶可喜九臯宵淚流清泚宿鷺窺魚癡計耳整整丰
標漫說佳公子月白風清天似水青田回首生愁思

文忠集卷三

欽定四庫全書

文忠集卷四

元 王結 撰

雜文

上中書宰相八事書

中書相府下執事某聞天生民而立之司牧內設公卿
外置藩屏蓋將撫循教訓其民人勉其不逮而養其無
告俾各奠其生各遂其性非但以崇高之位美食安坐
富貴娛樂之也故長縣者憂一縣守郡者憂一郡居輔

相者憂天下亦非所勉強而為之蓋皆全其性分之所
固有行其職分之所當為故耳恭聞相府諸公留意經
綸勵精政治未明視事日昃不遑暇食憂勤之心可謂
至矣以非常之人據可致之勢又有憂天下之心苟能
循其本而行之則政可成民可安古之賢相可企及矣
蓋經世之道有本有末得其本則綱舉目張用力不勞
而天下治失其本雖竭精疲思用力愈勞而天下亂經
世之道其本者人材是也古之君子不動聲色雍容於

廟堂之上而天下治安者豈有他術哉亦惟興舉俊傑
共宅天位使賢者訏謀於上能者任使於下漸之以道
德摩之以仁義弼之以政刑如斯而已耳後世能盡其
道則大治或用其偏則小康周漢以還其理亂隆替之
迹可按而考也故曰人存政舉人亡政息又曰得士者
昌失士者亡國家自中統以來仰稽古昔建立省部百
司遷轉世官求治之意銳甚然而日復一日垂五十年
雖宇內無事而治安之效終未大著者何也蓋不端其

本而正其末不澄其源而清其流雖法令紛更威刑嚴密以茲求治如北轅適越愈驚而愈遠矣因循廢弛至于今日風俗未淳法制未備清濁無辨能否混淆官壅於上民困於下饑饉薦臻災異數見朝廷開悟故進退大臣更新庶務暨擢進二三老臣參預大政甚盛舉也將期丕平比隆粹古端本澄源政在今日必當廣求俊賢昭布庶位自兩府大臣暨臺察六部稍皆得人然後擇其通經術達治體識時務尤所謂傑然者聚精會神

都俞吁咈於廟堂之上講求古人良法美意損之益之
與時宜之建為一代之制大其規模密具文理法制既
定循序而行之變之以漸行之以確持之以久不責近
效小利以為三十年之規然後治功可成太平可致百
年宴安之弊可革也蓋歷代之政久皆有弊惟聖君賢
相為能變而通之以為長久之道然創法立制至難事
也在大臣啟沃君心灼知必如是行之然後可以振綱
紀得民心宗社靈長萬姓蒙福則不恤浮言不貳小人

法制可立也謹約前代之制可以濟當今之務者臚列條陳于左狂瞽之言相府擇焉可也

一曰立經筵以養君德傳曰君仁莫不仁君義莫不義一正君而國定矣故為治之本在于正君而正君之道貴于養德而所以養德者當用有道之士傳導之也仰稽前代開設經筵妙選真儒有道德者為講讀官以近侍貴臣崇儒樂善者為之長萬幾餘暇俾經筵官講明聖經從容啟迪以資聽覽日就月將緝熙光明篤信而

力行之則正心之理修身之則治國之道用賢之方無不盡善而民情物理稼穡艱難備見纖曲故開益聰明變化氣質薰陶德性莫此為至先儒所謂正心以正朝廷正朝廷以正百官正百官以正萬民是也

二曰行仁政以結民心三代以仁義化天下秦隋以威刑制天下秦隋之政令行禁止天下之人畏懼公上而無親順愛戴之心故人情易離國祚不永也有國者當仰法三代興行仁政所謂仁政者其本則愛與公也愛

則民心順公則民心服既順且服則上下交孚而為治
有地矣其事則制恒產薄賦斂厚之而不困慎刑獄戢
兵戈生之而不傷擢良吏去貪殘馴之而不害省營繕
減徭役節其力而不盡順其所欲去其所惡則天下之
人歡忻逸豫尊君親上愛戴無已如赤子之慕慈母豈
有強梗不順之心哉古之人所以鞏固丕基建長久之
業而無一旦土崩之患者用此道也

三曰育英材以備貢舉今學校遍天下教官塞銓然徒

文具而無其實以此求人材成風俗美猶繫風捕影不可得也願命內外儒臣各舉經明行修之人擇其尤者以為太學之師次以分教天下之學以官民子弟之俊秀者以為生徒專治經術屏棄隋唐以來科舉之業約周漢養士取士之制教之以孝弟忠信禮義廉恥格物致知修己治人之道修己以三綱五常為主治人以經世綜物為事待其有成獻其賢者能者于朝廷選用以有德行曉達治道為主或問以所治之經或諮以經

世之務其文辭學西漢策論可也學校之規養士之具
生徒之員考試之法入流之數更請考古人良法參酌
施用所貴教以經濟之業取以經濟之才庶幾他日有
通儒實材可備大用國朝貴族及諸國人亦令入學講
求修己治人之道知所謂稽古愛民者則亦可以從政
矣省部寺監掾吏出身入流之法更按前代典故詳議
更張處置施行

四曰擇守令以正銓選郡守縣令朝廷所賴以共理天

下者今漫無遴選汎然進用貪殘無狀者有之庸愚無
知者有之三年之間僥倖無事給由到部則為慎行止
無過犯之人資考本格復得遷用矣以此望民安政成
亦難矣哉願朝廷慎遴選之方立考課之法行黜陟之
典明保任之道宰執選府尹臺官侍從儒臣六部長貳
廉訪長貳各舉知州一人縣尹一人各道僉憲各路總
管知州各舉縣尹一人得前件所舉之人銓曹提其綱
要加察詳焉舉主多者先次差除後日所舉一人如贓

濫敗政者舉主坐之餘州縣官無人保任者雖資考滿格且只陞遷散官止於佐貳官內任用辟舉知州縣尹任迴民安事理果著實績廉潔才能又有舉者當加等陞擢旌別賢俊以破資格賢否同流之弊庶幾得人為國家愛養百姓寬賦斂均徭役俾各獲安寧遂其生此言亦粗舉大畧而已其節目之詳相府熟議可也

五曰敬賢士以厲名節古之仕者上自宰執下及丞尉雖貴賤有殊然皆王臣也故其所以相敬相下各有禮

節今之士者昧於此義上之於下頤指氣使詬辱怒罵
不以為過下之於上趨走奉承擊跽曲拳不以為恥此
有志之士所以寧老於丘壑而不圖進用耳他日學校
之政成黜陟之典立仕集者稍皆賢俊也請考前代典
故定其上下相見之儀相接之禮等殺度數燦然詳明
著之于令曉諭百官各宜遵守庶幾在位者崇禮讓厲
名節廉恥道行風俗淳美矣

六曰革冗官以正職制先王法天地四時立六官之職

上下相承則政有紀統事無分裂唐三省六部二十四
司蓋其遺意今既建立省部矣有戶部又有大司農司
有禮部又有太常寺光祿寺侍儀司會同館有兵部又
有通政院太僕寺尚乘寺又有伊克扎爾固齊有工部
又有將作院武備寺少府監中尚監利用監各寺監長
官資品視尚書有加焉如此則不相統屬政事紛裂虛
費廩祿多設掾吏實為冗長之甚其餘職司之繁不能
徧陳外路有行省又有宣慰司又有總管府不惟此耳

內自京師達州府長貳員數不勝繁多凡建官設司本
為民庶今職司太繁員數太衆不能治民徒為煩擾請
叅酌唐人遺制立二十四司以為六部統屬凡京朝職
司合歸六部者皆併入二十四司以復古制之舊則上
下相承政事有統紀而無分裂矣寺監之類唐宋雖或
設置然先儒論其重併冗長當合併裁革者甚衆非區
區鄙陋之私言也國家幅員之廣前古莫及方面要會
既建立行省如福建兩廣四川控制溪洞邊徼去處又

立宣慰司可也其餘路分宣慰司實為虛設又各州領數縣上屬省部又有總管府是古人所謂又當重併者也在朝職司員數多者可詳考古制漸行釐革州府之官請依唐宋故事大畧不設總管府大都會處立為府其餘去處止置州軍各領數縣直隸省部今廉訪司官監治按察之領縣不多庶易為治府設監郡一員知府一員以為長通判一員以為貳州軍亦如之幕官設數員分治六房如司戶參軍司理參軍之類是也幕僚多

而長貳少幕僚分掌事務商確可否長官提其綱而處
決之則政出於一有統紀倫序事可集而民可安矣不
至如今日官多而不一事繁而不簡之甚也

七曰辨章程以定民志古者上自公卿下及民庶冠婚喪
祭之儀第舍車輿之制衣服器用之法各有等差莫敢
踰僭故民各安其分而財用易給今禮制不修風俗侈
汰公卿大臣之家用不中節窮極奢靡以相矜誇富商
大賈爭相倣效莫知紀極金珠熒煌錦繡炫爛豈止乘

堅策肥履絲曳縞者或美惡不分貴賤無別既無厲禁
有財即為民無恒心日趨於利姦偽百端求厭其欲廉
恥道喪風俗日薄此政爭亂之道也今宜增損古制定
為章程公卿四民各有品節越禮僭上官有常刑如此
則貴賤差別奢儉得中民志有定而莫敢覬覦人情漸
歸於忠厚而爭亂消弭於未萌矣

八曰務農桑以厚民生今疆宇至廣生齒日繁然物益
貴民益困衣食日蹙轉徙日多不幸凶年饑殍滿路原

其所由蓋耕者少而食者多公私各無儲蓄上下奢侈用度不節故也救之之術當毆游惰歸之南畝優重農民勿令擾害州縣官有勸農之名無勸農之實文移堆積上下相蒙今宜慎選良吏準酌農書歲課種樹責其成效不為虛文行之久遠庶幾有益更考隋唐之法各路立常平倉官置本錢兼儲米粟布帛絲麻之類賤則加價而收之貴則下價而出之令廉訪司官提舉檢察糾其不如法者如此則雖水旱為災而物不騰貴矣國家

又當崇尚節儉賞與有節用度有經省營繕之役賤奇巧之服則穀帛可賤財用可豐饑饉可備民生厚而國力愈強矣

前件所陳皆當今急務非有甚高難行之事然政有更張事有改作庸人不便於己私者必以為生事而變亂舊章矣其因循苟簡之人反以為目前無效迂遠而濶於事情不若仍舊之為愈也此等之言皆似是而非各為身謀非國計也相府奕葉勲舊國之世臣又皆同心

一德復有老臣以輔贊之創法立制出於天理合於人情沛然孰能禦哉法制既備則上有道揆下有法守治功可期天下蒙福而相府之名上配房魏姚宋亦昭垂於無窮此根本之論似緩而實急似疎而實密不知者以為此皆人之所共知而老生之常談也然自古聖賢言治道者初無新奇可喜之論可以驚駭世俗之耳目雖以孟氏命世之才當七雄戰爭之際其所以告齊梁之君不過墾田藝桑崇孝悌興庠序以不忍人之心行

不忍人之政而已果能遵此軌轍堅確而行之則日計雖不足而歲計有餘矣某也一介疏賤上書相府妄言政事不待賈而售不待問而告又似乎干名躁進之人然某以為古之君子處畎畝而不忘天下之憂得位則行其道不得位則修其辭言行道亦行也况正人柄用衆賢彙進上將以酬聖君求治之意下將以塞百姓思治之心必當兼收並觀採羣言而折其衷制為宏規遠圖以創業垂後此千載一時也故某果於自信非干名

也非躁進也竊取古人處畎畝不忘天下之義是以冒昧法義罄竭愚誠慨然一言焉惟大人君子諒其草茅惓惓忠愛之心不斥其愚而省其一得之見儻有可採伏請相府敷奏而行之以裨新政之萬一則幸甚幸甚干瀆台嚴伏地待罪不勝戰慄惶怖之至

書松廳事藁畧

皇元紹運開一函夏爰自中統之初稽古建官庸正百度一時碩儒元老屹然立朝文獻彬彬莫可及也獨貢

士之制未遑舉行厥後臺閣之位率取敏銳材幹練達時事者居之其効官舉職治繁理劇固不乏人而格君經世蹈道迪德者蓋未多見也嗚呼豈天之產材隆于前而殺于後哉亦勢使然爾仁皇龍飛勵精圖治復尊用儒臣以風厲天下繼詔郡國賓興經明行修之士天子親策于廷而擢其俊秀焉於是文風丕變得人為多若吾友馬君伯庸尤所謂傑出者也釋褐應奉翰林明年擢六察官遂糾劾權姦薦揚儒雅凡治道根柢生民利

病莫不究其蘊而覈論之竟以觸忤貴倖居位十三月而罷乃輯其論事之書名曰松廳事藁畧余以友義之篤得竊觀焉然伯庸之文章簡潔精密足以鳴一世而服羣彥余固未暇論也余獨三復此書而慨然歎息者蓋由此可以仰窺仁皇崇儒之盛德用儒之實效中統文獻漸可復致而吾伯庸學與年進蹈道而迪德他日踐揚臺閣具格君之業經世之材必有大可觀者矣

高陽臺記

河間故宋為高陽關其境與遼相接精甲豪將資糧屯戍于此而管內都邑不啻數十東逾于海西及于山南至深冀北抵于白溝畫而守之地大以要故常選用重人以教以戰茲固城池之完高深堅廣他鎮莫能與等即城中東北有高陽臺乃為政者觀游之所也其崇倍差于城而閔廓壯大髣髴乎峰巖之形焉其上為堂為樓以燕以息更衣膳饗莫不畢具長人者蒞政之隙率邦之士夫僚吏燕飲鄉射焉非徒為觀美也柳子曰氣

煩則慮亂視壅則志滯君子必有游息之物高明之具
使之清寧平坦恒若有餘然後理達而事成又所以宣
上意通下情秩燕毛之序講獻醕之禮一張一弛之道
也大兵之後風摧雨剝日往月來若樓若觀皆墮於煙
埃沒於渺茫矣惟見老屋三間支撐傾倒而臺巋然獨
存予暇日嘗登覽焉雨霽風止煙靄澄淨遠眎西山修
眉了髻隱隱可數而城郭萬家沃野千里與夫岡陵谿
谷平原聚落突然窪然遠與天際遊人行客樵歌牧唱

前行後隨隱見遞出皆寓夫眺望之內而無所遺焉然
世之名觀游者多在於高山之巔窮澗之濱跋履崎嶇
登陟險阻非無事者莫能至而此臺連城邑挾市井朝
登暮眺往返不勞而高明爽塏絕埃壒脫塵囂豁如曠
如恍然若高山絕頂之表醒心快目賦詩把酒無適而
不宜者予於此樂焉故表而出之以告夫後之遊者

復齋記

昔者夫子講道洙泗微辭奧義罔不詳備而具要曰求

仁求仁之方夫子所以告諸子者亦云多矣而其要曰克己復禮蓋人受天地之中以生所謂性也性之為體純粹至善萬理具備而仁義禮智則具綱維然仁者天地生物之心盎然和粹流行通貫於四者之中亦猶春之生意周浹于四時也故禮者仁之節文義者仁之裁制智者仁之分別而仁則本心之全德也然人之生也其性固無不善氣則紛綸雜揉有清濁美惡之不齊是以耳目口體不無私欲之累見於視聽言動之間者一

皆違於禮而害夫仁焉苟無道以治之幾何其不至於人欲肆而天理滅哉故孔門教人以求仁為務而求仁之方則又以克己復禮為要也蓋克己者微而念慮之間著而言為之際審察所謂人欲之私者力去決勝拔本塞源不使少有一毫之累而復禮云者循規蹈矩品節燦然從容決洽深造於至極純全之域而止焉誠如是也則日用之間皆天理之流行而本心之德復全於我矣擴而充之又豈有一民之不被吾愛一物之不遂

其宜哉天理人欲雖為消長然克復之功不容偏廢若徒克己不知復禮則雖免徇物外馳之弊而亦無可居之地可即之安危殆脆艱而不能久也嗚呼此孔門傳授心法之要而顏子之所以幾於聖人者亦惟在于茲也其旨微矣然人亡世遠斯義久晦至程子朱子始發明其蘊奧而學者得聞其說顧真用力于是者未多見也某嘗與余講求是義而若志焉者其燕居之齋榜之曰復而又屬余記之以發其義余聞昔在上古聖聖相

承曰極曰中心傳神授至孔子名之曰仁而顏子以上
智大賢之資亦從事於斯焉後之士以希賢自任而學
顏子之學者所宜服膺而勿失也吾子以是名齋而自
厲可謂知所往矣然孔子之告顏子唯以力行為言而
顏子即請其目皆不及夫致知者蓋顏子致知之功平
日已熟一聞師言天理人欲洞見真偽故直以為己任
而不疑也學者則當先其致知之功凡仁道體用之全
天理節文之密視聽言動之非禮所以害夫仁者皆深

思明辨使之縷析毫明白昭晰而無所蔽焉則克復之功可得而施矣既有以致其知又有以踐其實涵養於未發之前省察於已發之際勉勉循循真積力久克之而至于盡去復之而至于純全蟬蛻人欲之私春融天理之妙則天地生物之心油然而胷中而晬面盎背自有不能已者為仁由已而由人乎哉吾子果能以是求之則未有不至焉者也故余承命不辭而備論其本末因附余所聞者如此使揭諸屋壁出入觀省而勿忘

所有事焉庶乎目擊而道存之意也

知行說

士之為學蓋欲變化氣質涵養德性微言精義融會于心而措諸具躬一人之身具仁義禮智之性父子君臣夫婦昆弟朋友之倫至於視聽言動進退步趨其緒至多其理至密苟不先有以知其所以然未有能行其所當然者也故必毫析縷解識其性情之別體用之異區別其分不同而會於理之至極如燭照數計明白曉

析洒然無疑然後能躬行實踐造於極致之地而無憾也知之明故行之力行之力則其知愈明矣體用相發不可偏廢一而二二而一者也然則知與行者豈非為學之要乎昔舜命禹曰人心惟危道心惟微惟精惟一允執厥中精者察人心道心之混淆致知之謂一者守本心之正而不使之離力行之謂允執厥中無過不及也夫舜禹天下之大聖授受之際猶以是為心法之傳則知行者固為學之要也然知吾知行吾行非強所不

可知責所不當行以吾心之明究可知之理物理既極
本心愈明則措諸具躬者始可得而言矣不以一知自
止一行自畫窮理於學問思辨之際力行於顛沛造次
之間使吾心之所具身之所接耳目之官手足之職無
一理之或遺無一事之不當則氣質變化德性純粹蓋
有不期然而然者矣其真為學之要也哉

惟一齋銘

惟昔有虞握符授禹精一執中爰勅茲語瑩然靈臺萬

物之基原氣原性曰危曰微操之伊何致其精一理盛
欲泯厥中允執神聖繼繼播此德音架燹斯世於千萬
年士蒙未知利于養正矧茲有立邈哉希聖躡序以進
擗墮索塗升高自卑馴致是圖天天燕居惟一斯扁默
語存存羹墻則見鏡考往訓矢此銘詩俛焉進修愛莫
助之

樂齋銘

相古先民道尊德鉅匪有他術惟學是務其學伊何深

造自得怡然渙然會于其極如彼飲食既厭既飲如彼
居室載燕載豫是曰樂學不息自强高明光大悠久無
疆嗟余小子稟茲陋質式遵成規永矢勿失博學詳說
切問近思夙夜匪懈疊疊孜孜集義主敬閑邪存誠動
靜交養業業兢兢任重道遠念茲在茲有確其志有永
其思升堂入室涵泳從容悠然自得天理昭融嗚呼小
子克慎克戒作此銘詩以詔無怠

題李宗孟母壽詩後

博陵李興宗孟以儒而寓于醫者也大德癸卯其母氏
年登八十時名卿碩儒文而詩之宗孟顯親之意可謂
厚矣至治壬戌余假守茲郡宗孟適有尚醫之召請余
題詩以續諸賢之什余嘉宗孟年踰知命母沒而思之
不衰今將待詔禁密行膺峻擢顯親之實必能遂其平
昔之志故矢詩之亂謹致此意宗孟好學高識當以余
言為不妄云

題杜和卿八十詩後

國子伴讀杜天翼順天屬邑鉅鹿人也其父和卿年登
八秩朝之縉紳錫之歌詩序引俾歸以為乃翁壽以余
承乏是邦故唯齋大集賢善之司業伯生國博皆猥以
見及天翼仍致伯生之命以鄙語為請乃作唐律一章
竊附朝賢盛製之後以致區區尚賢敬老之意又以答
吾故人別後垂憶之厚云

文忠集卷四